

mè in apertum inter Reformatos & Pontificios Cantones eruperunt bellum. Distat Wartoviâ ab oppido Sargans r. h.

D. 15. Sept. Mons, qui Venæ Chalybis Sarunetanæ est impositus, vocatur *Belfris*; pascua ejus ad Wartoviensem Parochiam pertinent. Nomen hoc est antiquum Rhæticum, cujus generis plura adhuc in his Regionibus reperiuntur, ut in Comitatu Werdenbergico, Dominio Gamsensi, Præfectura Saxensi, Valle Rhegulca, e. g. *Prada Strada*, i. q. *Pratum*, *Stratum*, locus in districtu Wartoviensi, *zu prend essen*, *prandere*, *ruppen*, q. d. rupes, montis, qui Palæopoli imminet, summum ferè jugum, &c.

*Wartoviâ* hodie digressi iter continuavimus per pagos *Sevelen* h. i. *Räfis* '. *Buchs*. *Werdenberg* h. i. *Grabs* ½. *Gams* ½. *Sax* ½. *Frümsen* ½. *Forsteck* ½. ubi Baronum de Sax antiqua, nunc Præfecti Tigurini est sedes. Nunc Præfecturâ fruitur D<sup>n</sup>. Wolphius, qui multa nos exceperit humanitate. Est hæc arx undique sylvâ cincta, eminenti situ locata, & contra primos hostium insultus muris & Vallo cincta, insuper Armamentario instructa, in quo adhuc visitur Baronis cujusdam de Sax Armaturâ Ferreâ cum Lancea, quâ usus fuit in decursoriis. Vidi quoque baculum magicum è ferro bicornem.

Dimidiâ horâ ab Arce profluit ex Rupe rivus, de quo perhibent, trahere eum originem suam ex Lacu Alpino *Diffentisser See*, in Pascuis Abbatiscellani montis Gamor conspicuo.

In sylvâ propè *Forsteck* est *aqua sulphurea*, & alia prope pagum *Sax*.

Memoratu est dignum, & Præfecto loci imprimis pro Oeconomia scitu necessarium, pecora, quæ in sylvâ Arcis & pratis vicinis educantur, in pagis vicinis benè vivere, & pingue fieri: alia è contra, quæ aliunde ex vicinissimis Pagis *Sax* & *Sennwald* in Præfecti terras advehuntur, brevi emori. Rationem pertendunt ex Rusticis loci quidam, quod Præfecti pecora in sylvâ multa vescantur *Fragaria*, quæ ipsa reddat salubriora, ut alibi quoque vitam servare queant; alii, quod quæ in paludosis primum nutrita sint locis, postea in sylvis non facillè vitam sanam protrahere possint.